

**Palanivel Lantik Sakthivel Sebagai Setiausaha Agung Baharu MIC
Bernama
14 May, 2013**

KUALA LUMPUR, 14 Mei (Bernama) -- Presiden MIC Datuk Seri G. Palanivel melantik anggota jawatankuasa kerja pusat A. Sakthivel sebagai Setiausaha Agung parti yang baharu, berkuat kuasa serta-merta.

Pelantikan Sakthivel, 43, bagi menggantikan Datuk S. Murugesan yang meletak jawatan hari ini, susulan kegagalannya merampas semula kerusi Parlimen Kota Raja untuk Barisan Nasional, pada pilihan raya umum ke-13 (PRU13), 5 Mei lepas.

"Saya yakin Sakthivel dapat melaksanakan tugasnya dengan baik untuk masa depan parti," kata Palanivel dalam kenyataan ringkas, di sini hari ini.

Palanivel berkata Sakthivel yang bertanding dan kalah di kerusi Parlimen Kapar pada PRU13 banyak membantu Murugesan menjalankan tanggungjawabnya sebagai setiausaha agung parti sejak setahun setengah yang lalu.

Mengulas peletakan jawatan Murugesan, beliau berkata Murugesan seorang yang berdedikasi dan banyak menyumbang kepada kejayaan parti.

"Dalam surat peletakan jawatannya, Murugesan membayangkan beliau ingin menumpukan perhatian kepada tugasnya sebagai peguam, firma guamannya dan juga keluarga," kata Palanivel.

Sementara itu Naib Presiden MIC Datuk M. Saravanan menyifatkan Murugesan sebagai seorang yang mesra, bekerja keras dan banyak menghabiskan masa memastikan parti mencapai sasaran strategiknya.

"Saya mengucapkan terima kasih kepada beliau atas sumbangannya dalam mengukuhkan parti sejak pelantikannya pada 2011," katanya dan menambah mereka yang gagal melaksanakan tugas wajar berundur bagi menyelamatkan parti.

Dalam pada itu, Sakthivel yang dihubungi Bernama meluahkan rasa terkejut dengan berita pelantikannya.

Sambil berterima kasih kepada Palanivel atas kepercayaan yang diberikan, jurutera yang juga ahli perniagaan itu berkata beliau akan menumpukan kepada tugas dan tanggungjawab berkaitan, bagi menaikkan MIC untuk kekal relevan dalam kalangan masyarakat India.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=949596>